

U sech e Skandal! Esou muss een et einfach soen. Jorelaang gëtt dem Bierger an der Biergerin dobausse gesot, et wier ee sech der Logementsproblematik bewosst, et wëlt ee géint d'Spekulation virgoen, an dann esou eppes. Dat kënnen mir Piraten net akzeptéieren! Ech kann net novollzéien, wéi esou eppes ka sinn.

Et gouf dunn an de Rapport eng Nott opgehol, datt dës Firms keng Aktivitéits commerciales mat dëse Wunnengen dierfen hunn. Bon, dat ass ... mir wëssen ... mir kennen déi Diskussioun iwwert d'Activitéits commerciales méi wéi genuch. An dat ass awer esou e Gummibegrëff. A virun allem, wann ee weess, wéi vill d'Firmestrukturen et gëtt, an datt een allkéiers fir een Objet quasi erëm eng Zweckgesellschaft ka maachen, da fänkt et awer un, iergendwou kokass ze ginn.

An da steet et just am Rapport, et steet net am Gesetz! Op där enger Säit verspricht eis de Premier a senger Ried zum État de la Nation eng Spekulationssteuer an eng Reform vun der Grondsteuer. Zweek Projeten, zu deene mer nach ëmmer keng Detailer kennen. Mir als Chamber wëllen dann d'Recht op Wunraum souguer als Staatszil an d'Verfassung schreiwen, an dann dat heiten. Eng Firma, déi Wäertpabeieren op de Marché bréngt, an all déi Firmen, un deenen dës éischt Firma Parte besetzt, sollen Haiser a Wunnenge besetzen dierfen, solle mat dëse Wunnengen dierfe Profit maachen.

Dat Ganzt hei weist einfach, wéi onéierlech d'Logementskris ugaange gëtt. Op där enger Säit verspricht mer Besserung, fir op där anerer Säit dann esou Projete wéi dat heiten ze stëmmen.

Här President, ech kann Iech ganz kloer soen, datt mir Piraten dëse Projet net matstëmme wäerten. Net, well mer net de Bifdeck wëlle verteidegen. Jiddweree vun de Lëtzebuergerinnen a Lëtzebuerger hätt gären e Stéck vun deem Bifdeck. Mee ganz einfach, well d'Logementskris ze akut ass, fir elo nach d'Immobilienpekulation weider unzeheizen.

Eis Positioun ass also kloer. Mee un der Regierungspositioun hunn ech, spéitstens no dësem Gesetzesprojet, nawell awer meng Zweifel. Well wa mer hei am Rhythmus vun der Sprangpressessioun beim Thema Logement Gesetzer ausschaffen, dann ass d'Logementskris nach eppes, wat eis Enkelkanner wäert beschäftegen. Dëst Gesetz ass ee grouse Schrëtt no hannen a keen no vir a fënnt dofir net eis Ënnerstützung.

Ech soen Iech Merci.

**M. Marc Goergen** (Piraten) | Ganz gutt!

**M. Fernand Etgen**, Président | Merci villmools, Här Clement.

D'Regierung huet d'Wuert, d'Madamm Finanzministeresch Yuriko Backes. Madamm Backes, Dir hutt d'Wuert.

#### **Prise de position du Gouvernement**

**Mme Yuriko Backes**, Ministre des Finances | Merci, Här President. Dir Dammen an Dir Hären Deputéiert, nach eng Keier dem Rapporteur Här Bauler e grouse Merci fir säi schrëftlechen a mündlechen Rapport.

Et ass e puermol iwwert de Bifdeck geschwat ginn. Ech wäert e selbstverständlech verteidegen, maacht Iech do iwwerhaupt keng Suergen. Et wäert do op alle Fall net u menger Determinatioun feelen!

**Une voix** | Très bien!

**Mme Yuriko Backes**, Ministre des Finances | Ech soen Iech dann och Merci fir d'Zoustëmmung, déi breet Zoustëmmung zu dësem Projet de loi. Et ass

wichtig, dass mir eng Finanzplatz hunn, déi Konkurrenzfähig a villfältig ass an dat och bleift. Dëse Gesetzesprojet dréit ouni Zweifel dozou bäi, andeems d'Aktivitéiten, déi op der Finanzplatz schon haut bestinn, konsolidéiert ginn an en Ëmfeld geschaaft gëtt, fir dass och nei Aktivitéiten zu Lëtzebuerg kënnen gemaach ginn.

Lëtzebuerg huet sech scho virun enger Rei vu Joren e gesetzleche Kader ginn fir den Developpement vum Titrisationengeschäft. Dëse legale Kader huet sech an der Praxis bewäert: Lëtzebuerg ass ënnert den Top-3-Länner an Europa an dësem Beräich.

Fir dass dat esou bleift, riichte mir mat dësem Gesetzesprojet de Bléck dann och weider no vir. D'Titrisation ass eng Finanztechnik, déi der reeller Ekonomise zeguttkënn, nei Liquiditéit fir Banken an Entreprises schaaft an nei Investissementsmëglichkeete kreéiert.

Dat huet och d'Europäesch Kommissioun rezent ënnerstrach, andeems se sech fir e méi breede Gebrauch vun der Titrisation am Kader vun der ekonomescher Relance no der Pandemie ausgesprach huet.

Här President, dëse Gesetzesprojet klarifizéiert d'Gesetz iwwert d'Titrisation op eenzele Punkten a passt et eebe un déi aktuell Exigencë vum Marché un. Dobäi gëtt awer och eng Keier de Schutz vun den Investisseuren gestärkt. D'Modernisation vum Gesetz vun 2004 soll den Entitéiten, déi wëllen ënner Lëtzeburgerrecht eng Titrisation realiséieren, nei Mëglichkeete ginn, fir dës ënner kloer Konditiounen auszuféieren.

Dofir wëll ech vläicht dann och direkt op d'Remark vum Deputéierte Mosar agoen. Et gouf mat alle Concernéierte geschwat. Mir hunn hei probéiert, den Equilibre ze fannen a mir sinn och ganz bewosst hei de Mëttelwee gaangen. Mir hunn de Mëttelwee gesicht, fir souwuel den Demandé vun den Acteuren um Terrain nozekomme wéi awer och, fir d'Protektioun vun den Investisseuren an d'Kontroll vun de Risikoe weider sécherzestellen. Mir sinn zouversichtlech, dass heimat déi richteg Jalone gesat ginn, fir dass d'Finanzplatz och an dësem Segment kompetitiv bleift.

Ech kéim dann och kuerz op den zweete Volet vum Gesetzesprojet, deen als Objet huet, d'europäesch Reglement iwwert de Crowdfunding ze operationaliséieren. Lëtzebuerg begreift den europäeschen Text fir en harmoniséierte Kader an der EU, fir eeben eng nei Zort vu Finanzprestatairen ze reglementéieren, déi Crowdfunding-Service fir Entreprene ubidden.

De Gesetzesprojet iwwerdréit dem nationale Finanzregulateur, also der CSSF dofir nei Attributiounen an och Pouvoiren, dat fir d'Surveillance vu Crowdfunding-Prestatairen ze assuréieren.

Et ass wichtig, dass Europa sech och an deem Domän en eenheetlech Reegeliwerk ginn huet, wat de Betriber nei Finanzmëglichkeete gëtt, Rechtssécherheet schaaft an den Investisseur schützt.

Här President, hei schléisst sech dann de Krees mam éischte Volet vum Gesetzestext. Mir moderniséieren eis Gesetzgebung, mir diversifizéieren eis Finanzplatz - ech mengen, dat ass ganz wichtig - a mir stäerken d'Kapitalmarchéen, wat och eiser Ekonomise zeguttkënn.

Ech soen Iech Merci.

**Plusieurs voix** | Très bien!

**M. Fernand Etgen**, Président | Merci villmools, der Madamm Finanzministeresch Yuriko Backes. D'Diskussion ass elo ofgeschloss.

Mir kommen elo zur Ofstëmmung iwwert de Projet de loi 7825. Den Text steet am Document parlementaire 7825<sup>3</sup>.

#### **Vote sur l'ensemble du projet de loi 7825 et dispense du second vote constitutionnel**

D'Ofstëmmung fänkt un. Da komme mer zum Vote par procuration. De Vott ass ofgeschloss.

An de Projet de loi ass mat 54 Jo-Stëmme bei 4 Nee-Stëmmen ugehol.

*Ont voté oui : Mmes Diane Adehm, Nancy Arendt épouse Kemp, MM. Emile Eicher, Félix Eischen, Paul Galles, Léon Gloden, Jean-Marie Halsdorf, Mme Martine Hansen, MM. Max Hengel, Aly Kaes, Marc Lies, Georges Mischo, Mme Octavie Modert (par M. Laurent Mosar), M. Laurent Mosar, Mme Viviane Reding, MM. Gilles Roth, Jean-Paul Schaaf, Marc Spautz, Serge Wilmes, Claude Wiseler (par Mme Martine Hansen) ;*

*MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusti Graas, Max Hahn, Mme Carole Hartmann, MM. Pim Knaff, Claude Lamberty et Mme Lydie Polfer (par M. Gusti Graas) ;*

*Mme Simone Asselborn-Bintz, M. Dan Biancalana, Mmes Tess Burton, Francine Closener, MM. Yves Cruchten, Mars Di Bartolomeo, Mme Cécile Hemmen, M. Dan Kersch, Mme Lydia Mutsch et M. Carlo Weber ;*

*Mme Semiray Ahmedova (par Mme Djuna Bernard), M. François Benoy, Mmes Djuna Bernard, Chantal Gary, M. Marc Hansen, Mme Josée Lorsché, M. Charles Margue et Mme Jessie Thill ;*

*MM. Jeff Engelen, Fernand Kartheiser, Fred Keup et Roy Reding.*

*Ont voté non : MM. Sven Clement et Marc Goergen ;*

*Mmes Myriam Cecchetti et Nathalie Oberweis.*

Freet d'Chamber d'Dispens vum zweete Vote constitutionnel?

(Assentiment)

Et ass also esou decidéiert.

#### **6. 7861 - Projet de loi portant modification de la loi du 17 avril 2018 relative aux indices de référence**

Als nächste Punkt um Ordre du jour kënn de Projet de loi 7861 iwwert d'Referenzindizen.

D'Riedezäit ass nom Basismodell festgeluecht an d'Wuert huet elo de Rapporteur vun dësem Projet de loi. A wie kéint dat anescht sinn? A mol net e Professer kéint et besser maachen ...

(Hilarité)

... wéi den honorabelen Här André Bauler.

**Plusieurs voix** | Oo!

#### **Rapport de la Commission des Finances et du Budget**

**M. André Bauler** (DP), rapporteur | Här President, léif alleguer, no där do Remark soen ech elo léiwer näischt.

(Hilarité)

Wann ee Kontrakter a gewëssene Beräicher ofschléisst, da muss ee sech a verschiddene Fäll drop eenegen, fir sech un externe Referenzen ze orientéieren. E ganz einfacht Beispill ass de variablen Zënssaz bei engem Immobilienkredit. Fir ze garantéieren, datt een de Marché suivéiert an net d'Bank just intern den Taux, den Zënssaz fixéiert, kann ee sech an deem Fall drop eenegen, fir en onofhängegen Indice de référence, e Referenzindex ze benotzen. Dësen Indice de référence gëtt da benotzt, fir d'Mensualitéiten ze berechnen.

Dat doten ass elo ee Beispill. Ech gi gärn nach aner Beispiller. Et gëtt natierlech eng etlech Fäll, an deenen d'Benotze vun esou engem Referenzindex, op englesch „Benchmark“ genannt, kann ubruecht sinn. Indices de référence ginn net just am Kader vu Finanzkontrakten an -instrumenter benotzt, mee och - fir dann e Beispill ze nennen -, fir d'Performance vun de Fongen ze berechnen, ze moossen.

Dat bedeit schlussendlech, datt Milliounen Kontrakter op esou Indicë baséieren. An do stellt sech d'Fro: Wat geschitt, wann esou en Indice de référence op eemol net méi weider fonctionéiere kann? Wien entscheet dann, no wat ee sech orientéiere muss? An dës Fro ass net just hypotheetesch, nee, si ass eigentlech ganz aktuell.

Här President, de Gesetzesprojet 7861, deen d'Gesetz vum 17. Abrëll 2018 zu den Indices de référence ofännert, huet Léisungen op dës Fro. De Projet ass den 22. Juli dat lescht Joer deposéiert ginn an e setzt dräi europäesche Reglementer ëm. Domat gëtt d'Reglement 2016/1011 iwwert d'Indices de référence ugepasst.

Als Alleréischts wëll ech awer nach konkret op de Fall agoen, deen déi hypotheetesch Fro, vun där ech elo virdru geschwat hunn, an eng reell Problematik ëmgewandelt huet. Et ass effektiv esou, datt de LIBOR, Ofkierzung fir London Interbank Offered Rate, den Ufuerderunge vu sou engem Referenzindex net méi gerecht ginn ass. Dat dote war eng diplomatesch Formulatioun, fir eeben net direkt ze soen, datt de LIBOR eigentlech e Skandal provozéiert hat.

Fir de LIBOR ze berechnen, goufen nämlech reegelméisseg bis zu 18 Banke gefrot, zu wéi engem Taux si géife Sue léinen, fir dann esou e Mëttelwäert an de fënnef geleefteste Wärdungen ze bestëmmen. Hei läit awer och schonn de Problem, also op gutt Lëtzeburger gesot: Hei läit d'Kromm an der Heck, well sou konnten d'Banke relativ einfach de LIBOR manipuléieren. Dat ass dann och leider geschitt!

Den Deutschlandfunk - ech hunn dat emol eng Kéier an der internationaler Press nogelies - huet an deem Kontext gemellt, ech zitieren: „Über Jahre hatten Mitarbeiter mehrerer Grossbanken wichtige Referenzzinsen für das Geldgeschäft der Banken untereinander manipuliert und damit eigene Geschäfte befördert.“ Eng ganz grouss däitsch Bank huet missen an deem Kontext iwwer 2,5 Milliarden Dollar Strof bezuelen, well Mataarbechter solle gehollef hunn, fir de LIBOR ze manipuléieren.

Dowéinst brauche mer also um europäeschen Niveau Reegelen, déi et erlaben, en Indice de référence ze ersetzen, och wann déi eenzel Kontrakter dat net virgesinn. Mir sinn also drop beduecht, fir déi juristesche Onsécherheeten ze minimiséieren an esou déi finanziell Stabilitéit ze garantéieren, wann et drëm geet, de Gebrauch vun engem Indice de référence ze stoppen.

D'Zil ass et also, e Kader ze setzen, fir en Indice de référence, deen a Verruff geroode ass oder eventuell duerch aner Grënn gestoppt gëtt, duerch e besseren, zuverlässigen Indice ersetzen ze kënnen, en Indice, deen anescht berechent gëtt a wou d'Administratioun sech un d'Reegelen halen.

Dowéinst ass d'Kontroll vun dese Reegelen immens wichteg. Am Kader vun engem weideren europäesche Reglement gëtt déi europäesch Autoritéit vun de Finanzmäären mat der direkter Iwwerwaachung vun de wichtegen Indicen an hiren Administratioun beoptraagt. Zousätzlech wäert dës Autoritéit och déi auslännesche Indicen unerkennen, wa se de Krittären entsprechen. Dës Ännerungen triede retroaktiv op den 1. Januar vun deem Joer a Kraaft. Iwwerdeems ginn d'Sanktiounen, wéi se am Artikel 4 vum Gesetz

zu den Indices de référence stinn, duerch dese Projet erweidert. Weider Detailler fannt Der wéi gewinnt am schrëftleche Rapport.

Zu den Avisen. De Staatsrot huet a sengem Avis vum 17. Dezember zejoert keng formell Oppositoun ausgeschwat. En huet sech drop beschränkt, e puer kleng Remarken ze maachen.

Och d'Chambre de Commerce huet an hirem Avis vum 24. September zejoert keng Commentaire formuléiert a stëmmt also dem Gesetzesprojet zou.

Fir d'Detailler verweisen ech op déi zwee Avisen.

Och, léif alleguer, wa keng gréisser Ännerungen hu missen en cours de route gemaach ginn, soen ech der Madamm Finanzministesch an hiren Ekippen Merci fir d'Erklärungen, déi si eis an der Cofibu ginn hunn. An ech soen och mengem Attaché, dee mer bei der Redaktioun vun deem Rapport gehollef huet, hei mol eng Kéier Merci.

Dir Dammen an Dir Hären, et soll ee Gesetzter net no hiren Gréisst, no der Längt vum Text bewäerten. Och wann dat hei e klengt Gesetz ass, ass et en immens wichtegt Gesetz, dat hoffentlech eng breet Zoustëmmung fënnt. Op jidde Fall gëtt d'DP-Fraktioun elo schonn den Accord zu deem Text.

Ech soen Iech Merci.

**M. Fernand Etgen**, Président | Merci villmools, dem Här Rapporteur André Bauler.

An den éischten ageschriwwene Riedner ass den honorabelen Här Laurent Mosar.

**M. Laurent Mosar** (CSV) | Jo.

**M. Fernand Etgen**, Président | Här Mosar, Dir hutt d'Wuert.

#### Discussion générale

**M. Laurent Mosar** (CSV) | Merci och nach eng Kéier dem Rapporteur: jamais deux sans trois.

Et ass schued, datt mer de Mëtten net nach e véierte Projet hunn, soss hätt den Här Rapporteur de Grand Chelem gemaach, wéi een dat am Tennis nennt. Mee dat kënnt da vläicht eng Kéier bei enger nächster Geleeënheet, Här Rapporteur.

Ech kann och soen, datt mer direkt eis Zoustëmmung zu deem Projet wäerte ginn. De Rapporteur huet beschriwwen, ëm wat et geet. Duerfir brauch ech net méi dorop anzegoen.

Ech wollt awer vun deem Gesetz profitéieren, fir nach eng Kéier eng generell Remark ze maachen, well an deem Gesetz jo vill rieds geet vun de Kompetenzen vun där sougenannter AEMF, Autorité européenne des marchés financiers, déi jo duerch desen Text, wéi gesot, eng ganz Rei vun zousätzlechen Kompetenzen wäert kréien. A virdun ass geschwat ginn, Madamm Ministesch, vu Büfdeck verkafen oder verteidegen, an ee vun deene gréisste Riske fir eis Finanzplaz ass, datt mer riskéieren, ëmmer méi Kompetenzen vun eisen nationale Regulateuren un europäescher ofzeginn.

Mir hunn déi europäesch Zentralbank, mir hunn elo hei d'AEMF, mir hunn d'EMA, d'EBA an et mierkt een, wann een déi Texter allkéiers liest, datt et awer esou lues a lues zu engem Transfert vu Kompetenzen vun nationalen Regulateuren un den europäesche geet. Dat gesäit ee ganz besonnesch och an der Fongenindustrie, bei der EMA. An do ass ëmmer en Hannergedanken derbäi: nämlech den Hannergedanken, datt sech den Zentrum, ganz besonnesch wat d'Fongegeschäft ubelaangt, Richtung Paräis géif entwéckelen, well Paräis sech och wëllt zu engem groussen Fongestandard erop schaffen.

An do muss een also ganz, ganz wachsam sinn! Et geet also net nëmmen ëmmer drëm, fir elo ze kucken, wat an den eenzelen Texten esou direkt fir Lëtzeburger erauskënnt oder net, mee hei ass esou eng schlächend Gefor. An ech mengen och, Madamm Ministesch, Äre Virgänger an och Är ganz Administratioun ass sech och där doter Gefor bewosst. Mir mussen also alleguerten déi Texter ëmmer ganz genau kucken an et ass wichteg, datt déi weesentlech Kompetenzen awer ëmmer bei deenen nationale Regulateuren bleiwen an net alles bei déi europäesch Zentralinstanz geet.

Dat gesot, nach eng Kéier, bréngen ech hei den Accord vu menger Fraktioun. Merci.

**M. Fernand Etgen**, Président | Merci villmools, Här Mosar. An da geet d'Wuert un den honorabelen Här Dan Biancalana.

**M. Dan Biancalana** (LSAP) | Merci, Här President. Ech wëllt och hei dem Rapporteur Merci soe fir säi mëndlechen a schrëftlechen Rapport. Ech mengen, en ass op eng ganz Rei Elementer a sengem Rapport agaangen. An am Fong sierge jo déi nei Modifikatiounen, déi mer haut hei stëmmen, fir eng Maximiséierung vun der finanzieller Stabilitéit. A mir wësse jo och, dass dës Evolutioun, déi mer hei stëmmen, sech mat deenen Elementer effektiv an de Kontext aschreift vum sougenannte LIBOR-Skandal. An et muss ee virun Aen hunn, dass dat am Fong e weltwirtschaftlechen Schued mat sech gedroen huet vu 15 Milliarden. Iwwer 9 Milliarde Strofe si bezuelt ginn an och eng Rei Prisongsstrofe goufe geschwat. An ech mengen, dës Gesetz dréit also zu enger transparenter an och stabiler Finanzpolitik bäi, an dee Moment ginn ech dann och hei den Accord vun der LSAP-Fraktioun.

Merci.

**M. Fernand Etgen**, Président | Merci, Här Biancalana. An da geet d'Wuert weider un den honorabelen Här François Benoy.

**M. François Benoy** (déi gréng) | Jo. Villmools merci, Här President. Ech wëll och dem Rapporteur villmools Merci soen. An ech ginn heimat den Accord vun der grénger Fraktioun.

**M. Fernand Etgen**, Président | Merci, Här Benoy. An da geet d'Wuert weider un den honorabelen Här Roy Reding.

**M. Roy Reding** (ADR) | Merci, Här President. Och vun eiser Säit aus merci un de Rapporteur. Ech mengen, de Bierger dobaussen, deen Äre Rapport gelauschert huet, weess ganz genau, ëm wat et geet, an dat bei engem techneschen Text. Felicitatioun! Chapeau! Gutt gemaach! An d'ADR wäert deen Text da selbstverständlech matstëmmen.

**M. Fernand Etgen**, Président | Merci villmools, Här Reding. A leschten ageschriwwene Riedner ass den honorabelen Här Sven Clement.

**M. Sven Clement** (Piraten) | Merci, Här President.

Merci dann och nach eng Kéier un de Rapporteur, deen dann haut en Hattrick gelant huet, nämlech dräi vun dräi getraff.

Mir Piraten sinn averstane mat der AEMF. Mir fannen dat wichteg an néideg an dofir gi mir eisen Accord. Ech soen Iech Merci.

**M. Fernand Etgen**, Président | Merci villmools, Här Clement.

D'Regierung huet d'Wuert. D'Madamm Finanzministesch Yuriko Backes.

#### Prise de position du Gouvernement

**Mme Yuriko Backes**, Ministre des Finances | Dat maachen ech vläicht wéi déi aner a schwätzen och



vun hei. Merci nach eng Kéier dem Rapportier fir seng exzellent Aarbecht och op dësem Projet an där ganzer Chamber fir d'Ennerstëtzung.

Ech mengen och, dat heiten ass eppes ganz Wichtiges, wou mer eis eens sinn, dass et wichteg ass fir eis Finanzplaz. An dofir soen ech Iech Merci fir déi gutt Zesummenaarbecht a fir d'Zoustëmmung, le moment venu, dann hei.

Och wat d'Surveillance ugeet - ech mengen, dat sinn Diskussiounen, déi mer en permanence féieren, Här Mosar, Dir hutt et soulevéiert -, si mer eis eens. Mir sinn eis d'äers ganz bewusst. Verschidde Saachen, fanne mer, kënne mer besser mat eisen nationalen Autoritéite maachen an der Surveillance. Et muss net alles besser vu Paräis aus oder soss anzwousch gemaach ginn. Mir sinn eis där Problematik ganz bewusst a mir kucken dat och ëmmer ganz am Detail. An ech kann Iech och vergewësseren, dass dat mat mir net wäert vill anescht sinn.

Voilà! Ech mengen, et huet kee Wäert, dass ech elo nach weider an d'Detailer ginn. Den Här Bauler huet alles wirklech perfekt erkläert. Ech soen Iech Merci fir déi exzellent Zesummenaarbecht mat der Cofibu, par le passé an, ech mengen, och an Zukunft. A vun dëser Plaz géif ech dann och wëlle menge Kollaborateuren am Finanzministère, déi eng exzellent Aarbecht maachen op all deene Projeten, e grouse Merci soen.

Merci Iech.

**M. Fernand Etgen, Président** | Merci villmools, ...

**Plusieurs voix** | Très bien!

**M. Fernand Etgen, Président** | ... der Madamm Finanzministesch Yuriko Backes. D'Diskussioun ass elo ofgeschloss.

Mir kommen elo zur Ofstëmmung iwwert de Projet de loi 7861. Den Text steet am Document parlementaire 7861<sup>3</sup>.

**Vote sur l'ensemble du projet de loi 7861 et dispense du second vote constitutionnel**

D'Ofstëmmen fänkt un. Da komme mer elo zum Vote par procuration. De Vott ass ofgeschloss.

An de Projet de loi ass mat 57 Jo-Stëmmen bei 2 Abstentionen ugeholl.

*Ont voté oui : Mmes Diane Adehm, Nancy Arendt épouse Kemp, MM. Emile Eicher, Félix Eischen, Paul Galles, Léon Gloden, Jean-Marie Halsdorf, Mme Martine Hansen, MM. Max Hengel, Aly Kaes, Marc Lies, Georges Mischo, Mme Octavie Modert (par M. Laurent Mosar), M. Laurent Mosar, Mme Viviane Reding, MM. Gilles Roth, Jean-Paul Schaaf, Marc Spautz, Serge Wilmes et Claude Wiseler (par Mme Nancy Arendt épouse Kemp) ;*

*MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusty Graas, Max Hahn, Mme Carole Hartmann, MM. Pim Knaff, Claude Lamberty et Mme Lydie Polfer (par M. Max Hahn) ;*

*Mme Simone Asselborn-Bintz, M. Dan Biancalana, Mmes Tess Burton, Francine Closener, MM. Yves Cruchten, Mars Di Bartolomeo, Mme Cécile Hemmen, M. Dan Kersch, Mme Lydia Mutsch et M. Carlo Weber ;*

*Mme Semiray Ahmedova (par Mme Josée Lorsché), M. François Benoy, Mmes Djuna Bernard, Stéphanie Empain (par Mme Djuna Bernard), Chantal Gary, M. Marc Hansen, Mme Josée Lorsché, M. Charles Margue et Mme Jessie Thill ;*

*MM. Jeff Engelen, Fernand Kartheiser, Fred Keup et Roy Reding ;*

*MM. Sven Clement et Marc Goergen.*

*Se sont abstenues : Mmes Myriam Cecchetti et Nathalie Oberweis.*

Freet d'Chamber d'Dispens vum zweete Vote constitutionnel?

(Assentiment)

Et ass also esou decidéiert.

## 7. Heure d'actualité du groupe politique CSV sur la perte du pouvoir d'achat des ménages

D'Chamber féiert haut de Mëtteg eng Aktualitéitsstonn iwwert de Verloscht vum Pouvoir d'achat, déi d'CSV-Fraktioun ugefrot huet. D'Wuert huet elo den honorabelen Här Gilles Roth als Vrieder vun der CSV-Fraktioun. Et hu sech schonn ageschriwwen: den Här André Bauler, d'Madamm Cécile Hemmen, den Här François Benoy, den Här Fred Keup, d'Madamm Myriam Cecchetti an den Här Sven Clement.

Här Roth, Dir hutt d'Wuert.

**Exposé**

**M. Gilles Roth (CSV)** | Merci, Här President, Dir Dammen an Dir Hären ... Och Madamm Minister, wëllkomm an der Chamber! Et ass Ären éischten Optritt haut de Mëtteg.

Här President, Dir Dammen an Dir Hären, d'Energiepräisser explodéieren an d'Regierung kuckt no. „Mir loosse keen am Ree stoen“, gëtt de Premier net midd ze soen. Abee, dës Regierung léisst d'Leit äiskal an der Keelt setzen!

**Plusieurs voix** | Très bien!

(Brouhaha)

**M. Gilles Roth (CSV)** | Jo, jo.

**Une voix** | O!

**M. Gilles Roth (CSV)** | Dozou, ...

(Brouhaha)

... jo, jo, dozou zwee Beispiller.

Een Tank fir den Auto, Diesel, den 31.12.2020, also Silvester 2020: 50 Liter, 50 Euro. Haut, dee selwechten Tank Diesel: 50 Liter, 75 Euro. E Plus vu 50 %!

Heizungsmazout. 59.000 Stéit hei am Land heize mat Heizungsmazout, 4.000 Liter en Tank. Den 31.12.2020: 1.824 Euro. Haut, mat den neie Präisser vu gëschter: 3.704 Euro. Dat ass e Plus vun 1.900 Euro, vu méi wéi 100 %!

Dir Dammen an Dir Hären, d'Präisdeierecht - dat wëll ech domadder soen - geet bis wäit an d'Mëttelschicht vun de Leit eran, an d'Regierung stécht de Kapp an de Sand. A Frankräich, an der Belsch, iwwerall an Europa agéiere se, an déi hu Milliounen Leit ze geréieren, an net e Vollek vu 650.000 Awunner!

An déi Präisdeierecht, Dir Dammen an Dir Hären, concernéiert net nëmmen d'Bierger am Land. Ech mengen dass de Gros vun eis heibannen den Hëllefsschrei vun de Betriber, a besonnesch vun dem Horeca-Secteur d'lescht Woch duerch d'Wuert vun hirem Generalsekretär, dem Här Koepp, um 08.10 Auer op RTL awer héieren hunn. D'Betriber, besonnesch den Horeca, hunn eng Pandemie ze geréieren zënter zwee Joer: op, zou, op, zou. Si wësse selwer net méi, wat ass.

Déi hu Käschen. Déi hu manner Clienten. Si hu manner Émsaz. A si hu virun allem vill méi héich Energiepräisser. An ech mengen, dass den Här Koepp seng Wierder ofgewien huet, wéi e gesot huet vun der Regierung: „Dat do ass Inaktivismus an dat ass scho bal eng Frechheet.“

Här President, Dir Dammen an Dir Hären, dat do, dat packen d'Leit net méi laang. An dat kann och net esou

virugoen. Eent vun den Haaptargumenter, firwat et esou ass, dat ass, dass d'Leit net nëmmen d'Energiekäschen ze droen hunn, mee dass se nach zousätzlech héich Liewensmëttelkäschen hunn, wa se an de Supermarché ginn oder soss enzwousch. Wat hunn d'Leit nach zousätzlech? Si hunn och Assurancëprimen: 15 %.

D'lescht Joer, wéi mer dat mat den Iwwerschwemmungen an enger Aktualitéitsstonn thematiséiert hunn, nach doiwwer am Cercel, ass gesot ginn: „Et ass alles ënner Kontroll. Et ass kengem eppes geschitt. Mir ware gutt. Et war alles tiptopp.“ Wat ass geschitt? Jo, d'Assurancen hu bezuelt, 300 Milliounen a méi. Mee d'Leit kréien elo d'Quittung: 15 % méi Assurancëprimen. Wësst Der, wat dat heescht bei engem Haus? Doheem bei enger Famill? Wat dat fir e Plus ass?

An da komme jo net nëmmen d'Assurancëprimen. Da kënnt nach dat ounihin deiert Wunnliwien, dat d'Leit hunn. Déi héchste Präisser. Gëschter hu se an enger Zeitung an der Belsch Präisser fir Appartementer bis ronderëm Bréissel ugin: 300.000, 400.000 Euro. Vergläicht dat emol mat hei; do ass et ëm d'Millioun.

Mee wéi sollen d'Leit dat do mam Loyer a mat hirer Schold nach stemmen? An den Haaptproblem, Här President, Dir Dammen an Dir Hären, dee gëtt jo guer net ugeschwat - mir hunn en thematiséiert iwwer Méint, iwwer Wochen, iwwer Joren -, dat ass déi Netberengegung vun der Inflation um Niveau vun der Steiertabell. Dat heescht dat.

**Une voix** | Très bien!

**M. Gilles Roth (CSV)** | Well domat gëtt de Leit künstlech d'Kafkraaft entzunn.

An ech ginn Iech e kloert Beispill. Ech war selwer erfieert, wéi ech dat iwwert de Weekend gekuckt an nogerechent hunn. Mir hunn 298.000 Stéit a Steuerzueler hei, déi zu Lëtzebuerg usäseg sinn. Wësst Der, dass vun deenen 298.000 - Dir kënnt et noliesen am Avis vum CES - der iwwer 150.000 e marginale Spëtze-steiersaz vun iwwer 40 %, Solidaritéitssteuer abegraff, bezuelen? Iwwer 150.000 Stéit! Wësst Der, wat dat heescht? Dat heescht, dass eng alengerzéiend Persoun, déi en Nettoakomes vun 3.100 Euro de Mount huet - do ass se zu Lëtzebuerg nach net mat Zoossiss ugestréckt -, bei enger nächster Indexbranche, wa se da kënnt, 100 Euro bäikritt, well se dës op de Bruttoloun vu ronn 4.000 Euro gerechent kritt. Vun deenen 100 Euro ginn der 40 an d'Steieren.

An da kënnt nach d'sozial Laascht, wa se Loun- a Gehaltsempfänger ass. Déi muss se och nach bezuelen. Den Independant bezilt dat Duebelt. Da bezilt se do nach eng Kéier 12, 13 Euro op déi 100 Euro derbäi. Dat heescht, déi Persoun, alengerzéiend, 3.100 Euro, mat alle Chargen, plus Wunnegeld, wat nach op se zoukënnt, déi huet vun deenen 100 Euro, déi se bäikritt, manner wéi d'Hallschent. An ech hunn Iech virdrun de Präis gesot, wat de Surplus ass eleng bei enger Tankfëllung: Eleng bei enger Tankfëllung e Plus vu 25 Euro um Niveau vum Spritt.

Här President, Dir Dammen an Dir Hären, déi Steiertabell muss adaptéiert ginn. Ech weess net. Do kommen Einzelner a soen: „Dat do ass d'Politik vun der CSV, mat der Strenz.“

(Interruption)

Jo, mee et ass schonn eng Kontradiktioun a sech selwer, fir dat ze soen. Well mir hunn eng Steiertabell! Dat ass jo net e lineairen Taux, mee dat ass eng progressiv Steiertabell. Dat heescht: Wat Der méi Akommes hutt, wat Der méi Steiere bezuelt. A fir dann ze soen, dat wier eng Politik vun der Strenz, mee dat ass eng Kontradiktioun!